

**Aequilibrium mentis et corporis ... / disquisitioni publicae exhibebit A.T
Faber.**

Contributors

Faber, A. T.
Verdries, Johann Melchior, 1679-1735.
Justus Liebig-Universität Giessen.

Publication/Creation

Giessen : H. Müller, 1712.

Persistent URL

<https://wellcomecollection.org/works/cvp9mk88>

License and attribution

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>

ÆQVILIBRIVM MENTIS & CORPORIS,

A. D. G.

PRÆSIDE

IO. MELCHIOR. VERDRIES,

Medic. D. Philos. Nat. P. P. Ord.

& Acad. Imperial. Leopold. Nat.
Cur. Collega,

Ad diem Aprilis cl^o Icc XII.

Disquisitioni publicæ
exhibebit

ANTONIVS THEODOR. FABER,

Ober-Kirch. Coloniens. Phil. & Med. C.

GIESSÆ,

Typis HENNINGI MÜLLERI.

V I R O

Per-Illustri atque Excellentissimo,

D O M I N O

F E R D I N A N D O ,

S . R . I . L I B E R O B A R O N I

de & in FVRSTENBERG ,

Domino hæreditario in Schnellenberg ,

Waldenburg , Horst , Herdringen , Waterlappe ,

Husten , Bruchhaussen , Bocke

& Adolphsburg .

Dynastæ in Ober - Kirchen ,

Advocato hæreditario in Graffschafft

& Evvig ,

&c. &c.

In Ducatu Westphaliæ Nobili Consiliario

& Satrapæ hæreditario in Bilstein , Waldenburg

& Fredeburg .

Domino , Mæcenati & Patrono

*suo
demissè colendo .*

Auspicatisimos rerum successus,
Perennantem sanitatem,
Magnæ Familiæ
jugem æque ac lætissimum florem
& incrementa
perpetua,
votis,
quantum fieri potest,
calidissimis,
optat,
seque
juxta & hōc
Laboris & Exercitationis
Academicæ
exiguum monimentum
submissa, qua deceat,
observantia
consecrat

Per-Illustris Suæ Excellentiæ

humillimus servus
ANTON. THEOD. FABER.



DE AEQVILIBRIO MENTIS ET CORPORIS DISSERTATIO.

§. I.



I quicquam est in Naturalis Philosophiae amplitudine, quod nulla vel exquisitissima cogitandi ratione satis assequi, neque ideo tamen negare possumus, id sane est, quomodo natura illa omnibus corporeis soluta modis, quæ quicquid agit cogitando agit,

Modus
conjun-
ctionis cor-
poris & ani-
mæ huma-
no ingenio
impenetra-
bilis.

Pars melior nostri, divine lucis imago,

Mens alto cognata polo & cœlestibus auris,

cum extenso corporeo mira societate in unum coierit ac in mutuum actionum & passionum commercium descenderit, ita ut animus, ille æternitatis alumnus, angustis mortalis corporis vinculis coërceatur? Quod si enim ipsos nos excutiamus omnesque abditos per viscera motus, sensus, operationes curatius perquiramus, sua cuivis conscientia dictabit, hominis naturam conjunctione duorum diversæ naturæ principiorum absolvi: alterius cogitantis, quod mentem sive animam appellamus, corporei alterius partiumque extra partes positione extensi, impenetrabilis & structura organica ad varias motiones propendentis. Quicquid enim motuum, quicquid operationum in nobis animadvertisimus, id omne vel ad cogitationes vel motiones corporeas referimus. Quemadmodum id non minus inde clarissimum est: partes illas tanto naturæ hiatu inter se differentes, ut nihil in unius conceptu contineatur, quod alterius notio non excludat, adeo tamen arte in unam personam coagmentari, ut una

Omnis na-
træ opera-
tiones sunt
vel cogita-
tiones vel
motus cor-
pore.

sine altera nec affici, nec sine alterius adjumento negotia a Deo præfinita perficere queat, atque hinc, ex sapientissimo T. O. Creatoris instituto, anima corpori consociata, hujus non solum ministerio utatur, sed & in hoc unionis statu motionibus sive cogitationibus suis, organa ipsius varie afficiat & ab eorum vicissim motibus varia ratione afficiatur.

§. II.

Non datur
aliquid na-
ture mediae
quod spiri-
tuale hic
cum corpo-
re conjun-
cat.

Mutuum
tamen da-
tur attius.
que com-
merciū.

Vita corpo-
ris sive mo-
tus vitales
corporis
vinculum
quasi sunt
inter ani-
mam &
corpus.

Pro corpo-
ris consti-
tutione

Hæc novimus atque miramur; nec est ut vinculum, hamulos aut gluten aliquod intermedium operosius disqui-ramus, quibus spiritus cum corpore, immortalis cum mortali connectatur aut conglutinetur? vel substantiam quan-dam intermedium semi quasi spiritualem, Archeum aut simile quid, gratis configamus, vel spiritus sic dictos ani-males, ratione reclamante, huic muneri præficiamus: cum satius sit, id quod prudentissimi quique agnoscunt, in re difficulti, in sapientissimi Creatoris beneplacito acquiescere atque mirandam illam unionem inde, unde immediate ori-ginem duxit, a benignissima Dei voluntate, deducere. Illud enim satis superque perspectum habemus: eandem, illo jubente, ea lege coisse, ut, occasione certarum in corpore motionum, certæ cogitationes in mente exortiantur, & versa vice, certas hujus cogitationes certi corporis motus conse-quantur: idque mutuum cogitationum motuumque corpo-reorum commercium vinculum quasi esse inter hasce partes motusque corporis potissimum mentem huic alligare rectissime observat *Cordemoy de distinct. Ment & Corpor.* cum du-rante illo proportionato, vitali, partium fluidarum per solidas motu, anima corpori cohabiter, eo vero cessante & commercio quod menti cum corpore intercedit, corporis culpa conquiescente, illa vel invita expellatur.

§. III.

Vi igitur arctissimi illius commercii, corpus agit in ani-mam, ita ut pro varia dispositione atque temperie succorum, variis

variū motus in animo, experientia fidem faciente, exoriantur: unde homines pro ratione ætatis, vitæ generis, diætæ, varios quoque affectus induere & quoties a cibo potuque sanguinis & cerebri motus atque temperies mutatur, morum & cogitationum mutationem fieri, eundem hominem causæ ignarum, modo lætos in corpore motus sentire, modo contristari, ebrios vero & gulosos rationis usum amittere sibiique prorsus dissimiles esse, observamus: ut nihil de morbis, febricitantium & melancholicorum deliriis aliisque similibus commemoremus. *Corpus*, quod corrumpitur, aggravat animam & terrena inhabitatio deprimit sensum multa cogitarem. *Sapiens*. IX. 15. Agnovit idem *Plato* suo tempore & cum L. II. tum præcipue V. *de Legib.* amplissime docuit. Nec Pythagoræis id ignoratum fuit, qui ideo a carnium esu abstinebant, ne talium animantium mores una imbiberent, & cibos potius eligebant, qui succos præberent temperatores ad æstus & motus animi concitandos minus idoneos. Non sine ratione antiquissimus Medicinæ stator *Hippocrates*, *Libr. de flat.* S. XX. 3. *Ex iis*, inquit, *quaæ in corpore insunt*, nihil magis ad prudentiam confert quam sanguis, hic ergo cum consistenti habitu persistit, prudentia etiam constat: sanguine vero permutato concidit simul prudentia. Nec non *Libr. I. de Diæt.* S. XXXII. & sane hoc faciens, i.e. tali diæta & medicamentis utens, sanior & sapientior anima fuerit. Et ibidem S. XXXVI. 33. *Potestque ex diæta & melior & deterior anima fieri*. Id quod *Galenus* etiam *Libr. Quod animi mores sequuntur temperamentum corporis*, fuse demonstravit. Neque hinc frustra operam sumsit Celeb. *Hoffmannus*, nunc *Arch. Reg. Boruss.*, quando fundamentum morum in gentibus in ipsa corporis temperie quæsivit. *Diss. de Temper. fundamento mor. & morb. in Gentib.* Et sane, res manifestissima est, tam εὐλαγίας mentis, i.e. facultatem objectorum in organa nisum & actionem percipiendi, res perceptas conferendi, con-

nectendi atque inde judicium formandi, quam *ærægian* sive perturbatam hanc facultatem a sanguinis temperie depen-dere, atque ad exacuendam mentis & ingenii vim, exor-nandosque mores plurimum temperiem humorum con-ferre. Magni enim refert, inquit rursus Hippocrates, quali in corpore animi locati sint, multa enim in corpore existunt qua acuunt mentem, multa que obtundunt. Atque ita acutem tetigit sagacissimus des Cartes, quando *Libr. de Method. S. VI.*

Ingenium
acuendi ra-
tio in Me-
dicina quæ-
renda.

scribit : *Animus adeo a temperamento & organorum corporis dispositione pendet, ut si ratio aliqua possit inveniri, qua homines sapientiores & ingeniosiores reddat, credam illam in Medicina queri deberi.* Ex eadem ratione præstantissimi ingenii vir, Excell. Bergerus, Archiater Regius & Profess. Med. apud Wittenbergenses celeberr. de *Commod. vit. sobr.* p. 33. *Vitam,* inquit, quam laudamus medicinam morum merito nominare-morum medicina, ris, quia ut corpus temperatum servat & immune a vitiis suc-corum, que sunt radices perturbationum animi: sic immunem animum a violentis motibus istis, aut minus eisdem obnoxium, hosque rationi obedientes reddit, nec quicquam in corpore gi-gnit, vel relinquit, quod præstantiam vigoremque mentis labefactare queat.

§. IV.

Animæ
commoti-
ones consti-
tutionem
corporis
alterant.

*Animam vero, affectibus cum primis exagitatam, vicis-sim in corpus effectus suos exerere ejusve constitutionem varia ratione alterare & modo in melius, modo in deterius mutare, non minus extra dubium est. Quis enim non no-vit, quot & quantæ, ex animi, gaudio & lætitia recreati, con-tenta tranquillitate utilitates in corpus redundant? Jucundi-tas cordis, inquit sacra pagina, *hæc est vita hominis & exultatio viri longævitatis.* Ecclesiast. XXX. Et quem quæso latet, quantum animi motus immoderati corporis nostri integri-tatem convellant labefactent atque vigorem ipsius ever-tant? verissime Democritus Milesius: *Si corpus, inquit, animum**

in jus vocaret, haud futurum, ut muneris male administrati crimen effugeret. Ut non sine causa experientissimi Medicorum, frequentiam morborum in hominibus prae brutis ex affectuum immoderatorum frequentia, (frequentia inquam, cum affectus etiam in bruta cadant, quos tamen, non ita frequenter experiuntur; quibus non æque ac homines indulgent,) deducant atque hinc solum sapientem i.e. qui passionibus animi dominari easdemque non equidem, cum Stoicis, penitus extinguere, sed, cum Epicuro, debite moderari novit, esse longævum, pluresque ira, terrore, mœtore, curis aliisque affectibus, quam gladio, vitio aëris, erroribus diætæ &c. interire, afferere non vereantur.

§. V.

Exinde facile colligitur: sicuti hominis vita partium illarum essentialium unione mutuoque actionum & passionum commercio continetur, ita incolumem illam, tranquillam atque felicem a commercio illo æquabili &, mutuo in se agentium, proportionato nisu profici sci. Simulque hinc intelligitur: quemadmodum artis Medicæ hic non continentæ partes sunt, ita Philosophiæ quoque Moralis non omnino nullas esse; quæ animi, sicut illa corporis, motiones, moderari atque compescere docet ad mentis & corporis æquilibrium, hic adeo necessarium, conservandum. Adeoque, recte monente clariss. Baglivio, *Philos. & Medic. in Archi-Lyc. Romano celeberr. Canon. de Med. solidor. II.* qui staticen motionum animi per moralis Philosophiæ canones ad staticen motuum corporis, quam in specie *Sanctorius Sanctorii in Medic. Statica* eleganter tradidit, dirigere, accommodare viresque moventes utrinque in æquilibrio debita que ad se invicem proportione conservare non noverit, nec sanitati, nec vitæ diuturnitati prospicere noverit. Hoc æquilibrium unde inæstimabilis ille vitæ thesaurus, mentis pariter ac corporis sanitas imo ipsa vita dependet, fusius aliquanto atque

Frequentia
morborum
in homin.
prae brutis,

Solus sa-
piens est
longævus

Mentis &
corpor.
æquilibri.
Artis Med.
& Philo-
soph. mo-
ral. prae-
cis conser-
vandum.

atque explanatus hic persequi operæ pretium nos facturos existimamus. Verum ut eo clarius id ipsum possit perspici, animæ illa & corporis conjunctio paulo curatus erit inspicienda atque examinanda nec non quomodo, quibus mediis & instrumentis, anima corporis actiones moderetur ab iisdemque vicissim afficiatur & saepe perturbetur? dilucidius exponendum, si paucissimis saltem monuerimus, id quod ex dictis amplius obscurum esse nequit: nos æquilibrii vocabulo hic non uti in sensu strictiori, ubi Mechanicis duorum corporum æquilibratorum quietem denotat, sed latiori, quo certam motuum proportionem significat, idque consensu & auctoritate Philosophorum & Medicorum ex recentioribus gravissimorum.

§. VI.

Illud igitur primo anatomica investigatione exploratum perspectumque habemus: omne corporis humani solidum ex canaliculis conicis & elasticis, quos arterias vocamus, ex iisdemque propagatorum ductuum, in retis formam sibi intextorum, filis coagmentari & quicquid in artificiosissima machina motuum & actionum observamus, in certa vasorum ad se invicem & fluentium in iis humorum habitudine consistere. Scilicet, exsurgunt e cordis musculo binæ arteriæ, quæ in similes figura & motu ramos & minutim divisos ramulos abeentes, frequenti propagine, per omnes corporis partes partiumque particulas, musculos, viscera interque illa cor ipsum, membranas, &c. ita sparguntur & distribuuntur, ut maxima corporis pars inde contexatur. Sic corpus organicum sola contextione plurium diversi generis canalium, ducta ab arteriis origine miro artificio coaptatorum & versus cor partim reflexorum, interspersa hinc inde pulpa & pinguedine, absolvitur. Arteriæ enim in exilissimos ramulos divisæ, ubi partes ingrediuntur cum tunica musculosa elatrem deponunt, figuraque mutata, cum reflexos venarum

sangu-

Quid æqui-
librii voca-
bulum hic
denotet?

Corpus no-
strum ex
meris cana-
libus, ducta
ex arteriis
origine, reti-
culi in mo-
dum sibi
intertextis,
est constru-
ctum.

sanguinearum & serosarum, sive ut communiter audiunt, lymphaticarum, tubulos constituunt, tum in glomeres convolutæ glandulas & ex iisdem propagatos ductus secretorios & excretorios omniaque organa, variis hinc inde humorum præparationibus, depurationibus, secretionibus, quibus cum motu vita continetur, dicata, componunt. Inde cerebri duplex substantia, cinerea, uti vocant, glandulosa, ex complicationibus arteriolarum, & medullaris, canaliculosa, ex tenuissimis inde prodeuntibus ductibus conflata, originem cepit: quæ posterior in plurimas deinde nervosas conjugationes, hæque in tenuissima diductæ fila vel pansiæ in membranas, per partes, sensuum motionumque organa & universum corporis habitum, ad necessarios usus, sapientissimo optimi Creatoris instituto disperguntur. Inde renum & testiculorum cerebro in plurimis similium contextio. Inde pancreatis, glandularum salivalium omnesque oris, oculorum, totius canalis alimentorum, cutis aliarumque partium glandulosarum tubuli, (sola si exceperimus vasa bilaria, quæ non equidem immediate, mediate tamen intervenientibus venæ portæ propaginibus, ab arteriarum ramulis orta, cum his ipsis portæ & venæ cavæ surculis, ingens hepatis viscus componunt) enascuntur. Ut adeo omnes corporis humani partes vasculosæ sint & ab una origine corde scilicet provenientes, ad illud continuo filo reducantur, miroque ductuum contextu connexæ operationibus cum vitalibus & genitalibus, tum animalibus serviant. Confer. celeberr. Ruyshii Epistol. & Thesaur. Anat. nec non, qui pari hæc, cum solida & evidenti veritate, elegantia tradidit, Excell. Bergeri Physiol. Med.

§. VII.

Ut vero id, quicquid hic est muneris, rite exsequatur illa continua serie cohærens vasorum & filamentorum nervosorum contextio, succis quibusdam atque partibus fluidis

Fluida animat machinam.

diversi generis repleta & animata est, quorum mutuo reciproco & proportionaro influxu omnes mirificæ corporis actiones, motu non interrupto, mechanica necessitate procedunt, & quidem vi illius cordis cum cerebro hujusque cum illo & utriusque cum toto corpore, istius ministerio texti vasorum & qui iis continentur pressionis humorum, consensus & communionis. Ut enim ab ovo, quod ajunt, primaque origine rem repetamus: id nobis primo concedi postulamus, quod vix quisquam sanioris Physiologiae peritus in dubium vocaverit: embryonem omnibus suis partibus absolutum in ovulo delitescere nihilque in illo ad vitales actiones inchoandas desiderari quam motum. Cum vero nihil moveatur a se ipso, non sine ratione motorem hic perquirimus, qui fluidorum, in tenerimis vasculorum staminibus contentorum, primordia excitet, pellat & vitalis illius circuli, quem connexa vasorum contextio monstrat, initium faciat. Atque hic nullus est alius, quam fluidum subtilissimum seminale sub cohabitatione maritali a Patre profectum & per Fallopii tubas, ex nostra quidem sententia, ad ovulum delatum; quod, tanquam mobile, motum cum succorum primordiis communicat atque ita prima moti in embryone liquidi punctique in ovulo salientis causa existit. Et hac ipsa motuum instaurazione conceptio absolvitur. Quamprimum enim illo mediante fluido seminali mobilissimo fluida radicalia in ovulo delitescentia excitantur & turgescunt, exiguum corpusculum animatur, corculum contrahitur & postea pro elegantissima partium solidarum a diversi generis fluidis animalium mechanica, vitales illi motus, qui fotu & succis matris, quamdiu ab ea foetus pendet, tandemque aëre & victu subveniente magis exsuscitantur, continens sui ipsius causa sunt. Posita nempe dicta modo partium & vasorum connexione & qui his vehuntur succorum, in primis vero cerebri cum corde ac omnibus corporis membris, communione, non potest

Motor
quis?

Conceptio
nihil aliud
quam mo-
tuum in-
stauratio.

potest non reciproca cordis contractio & dilatatio semel inchoata & qui, inde dependet sanguinis in circulum motus in corpore sano continuare. Corde enim contracto & pulsante sanguis cavo ejus exprimitur & eliditur, vi, suo momento resistentiam totius sanguinis arteriarum & fasciarum ea-

Cordis, san-
guinem eli-
dantis, ma-
xima vis.

rundem dilatationem impedientium, quæ, secundum demonstrationem *I. A. Borelli de Mot. Animal. P. V. Propos. LXIII.* major est vi 180000. librarum, superante. Arteriæ dilatatae, quamprimum causa dilatationis cessat, resiliunt & sanguinem contentum, undique comprimentes, cum ob mechanicum valvularum cordis artificium regredi non possit per vasa minima intra musculos & viscera fasciis suis & vi Vis arteria-
machinæ non minus constricta, in venas & ex illis, adjuvante rum resi-
nervorum tonica constrictione, in auriculas patentes, vi, quæ, lieatum.
eodem demonstrante laudato *Borello* 135000. librarum pondus exsuperat, propellunt. Dum itaque cordis impulsus per arteriolarum infinitos fere ramulos, omnes totius corporis partes, in specie, per ramos carotides & cervicales, illam potissimum cerebri ex glomeribus arteriolarum contextam partem quam corticalem & glandulosam appellamus eandemq; cingentes membranas implet, non potest non fieri, quin arteriæ dilatatae, pulsantes, partes vicinas, in specie moliores cerebri pre-
mant atque depositam ibi puriorem & mobiliorem lymphæ partem in exilissimas fibrillas, ex quibus medulla conflata est, indeque propagatos nervorum funiculos, exprimant & rivulis continuo succendentibus ad omnes partes, musculos in primis, in quos nervi ultimo desinunt & inter illos ad validissimum cordis musculum leni placidoque motu propellant. Quo ipso accedit, ut, dum cor interea, resilientibus ob sanguinem, arteriarum systole, in arterias coronarias intrusum, ejus fibris, a systole ad diastolen rediit (quod eleganti demonstrazione expeditum dedit *Christian. Stræm, Nov. Theor. mot. reciproc. Mach. animal. juxta atern. motuum Leges, Propos. V.*)

Arteriæ in
cerebro, cor-
dis impul-
su, a sanguine
ne dilatatae,
cerebrum
premunt &
ita subtile
fluidum ibi
secretum in
nervos &c
partes pro-
pellunt.

Cujus influxu cor denuo contrahitur.

& ex venis per auriculas contractas novum sanguinem recepit, illius influxu succi nervosi mox iterum contrahatur: hisque reciprocis cordis & auricularum arteriarumque synchronis, contractionibus jugi circuitu humores in orbem pelluntur omnesque ab illo vitali circulo, cui alterni cordis motus & præsunt & debentur, pendentes actiones mirando non satis organorum apparatu & consensu perficiuntur.

§. VIII.

Cum itaque omnes totius corporis partes ex productionibus vasculorum & nervorum reticuli in modum contextæ sint atque influxu illo alterno continuo fluidi sanguinei & nervorum succi diversa ratione tendantur; non potest, non textum nervosum arterioso & hoc vicissim illi obluctari atque ita utriusque reciprocus oriri motus, quo, modo sanguinis impetu, modo nervorum a succo influente rite tensorum exsuperante elatere, æquilibrium alternis vicibus perit & restituitur. Ita, quod modo explicuimus, cordis continuus ac reciprocus motus alterno sanguinis in arterias coronarias & fluidi nervorum in fibras nervosas & musculosas ingressu absolvitur. Ita musculis musculosisque & nervosis per partes dispersis fibris, alterno, nervorum liquidi & sanguinis in vasculis interspersis eidem obnitentis, influxu, ad mediocritatis & naturæ leges constrictis & relaxatis, sanguinis lymphæque motus artificiosa compressione promovetur: ut hac ratione succi nervorum influxus sanguinis impetuose irruentis impressionem moderetur, quemadmodum hujus vicissim influentis expansio illius motum temperat & alterat. Mutua hac utriusque liquidi influentis ac moderata constrictione & expansione partibus sua constat tensio tonus atque vigor; illaque ipsa tensio & constrictio est, quam veteres facultatis retentricis & expultricis nomine innuere volebant.

Textum nervosum & arteriosum sibi mutuo obluctantur.

§. IX.

§. IX.

Quemadmodum ergo exinde clarissimum est, influ-
xum liquidi nervorum in partes & musculos a pulsu & leni
compressione arteriarum cerebri dependere, ita, cum ex
musculis, omnis motus in corpore organis & instrumentis,
alii antagonistis gaudeant, alii iisdem sint destituti; facile
quoque patet ratio, cur hi, quorum e numero quoque corent,
motibus automaticis serviant atque vel nesciente vel invita Ratio mo-
aut reluctante etiam anima actiones suas perficiant: illi vero tuum vita-
mentis imperio subjecti, pro arbitrio moveantur. Postero- lium necessa-
ritas enim non possunt non moveri, constrictis ab influente, nullo pre-
mechanica necessitate, nervorum succo, & brevioribus red- eunte vo-
ditis fibris, dum priores, influxu dicti liquidi utrinque æqua- luntatis im-
bili, cum antagonistis in æquilibrio constituuntur, ubi vi & cedentium.
motu superaddito opus est, quo aucta unius contractione & Volunta-
claterio æquilibrium supereretur. Hoc vero motus augmen- riorum.
tum nutu suo superaddit anima, ea lege corpori consociata,
ut motus nervorum fluidi, pulsu & pressione texti arteriosi
in cerebro ad corporis partes jam derivati, pro arbitrio diti-
gat, augeat variorumque motuum voluntariorum causa exi-
stat, & ab illius, nervos, in organis sensuum, replentis & inten-
dantis, variis motibus sive ab extra sive ab intra originem du-
ixerint, vicissim varia ratione afficiatur; id quod tum ipsæ ope-
rations edocent, tum ex eo quoque evidentissimum est,
quod nihil anima in corpore movere nullaque operatione
sive mobilissimi succi illius adminiculo perfungi potest.

§. X.

In propinquo hinc est perspicere, solum sanguinis &
succii nervorum reciprocum motum, in prima conceptione
inchoatum & dicta ratione continuatum ad motus automa-
ticos & necessarios sufficere, omnesque inde pendentes actio-
nes nihil esse aliud, quam alternam partium sibi obnitentium
æquilibrii destructionem & restitutionem, dum systema arte-

Omnis
motus
automati-
ci alterna-
destruc-
tione & resti-
tutione
æquilibrii
absolvun-
tut.

riosum cum nervoso continua potentiae moventis positione & privatione libratur, nullumque datur momentum, quo perennante vita motus in corpore alternis momentis non pereat & de novo exoriatur, & ex consequenti esse illas mere mechanicas, in quas animae per se nullum est imperium, cum, ceteris partibus, nulla cogitandi ratione vel accelerari, adjuvari vel coerceri cohibeive possint. Reliquas vero animales actiones, quas mixtas vocamus, non minus mechanica necessitate organisationis & habitudine instrumentorum corporeorum, anima tantum praesidente & dirigente produci, cum recte notante Inclito Bergero, *Physiolog. Med. L.I. c. I. p. 4.* ejus injussu vel etiam ingratiiis interdum fiant.

§. XI.

Anima
æquili-
brium tol-
lendo mo-
tuum vo-
luntatio-
rum causa
est, & occa-
sione mo-
tus fibrillis
cerebri im-
pressi, va-
rias passio-
nes sustinet.

His ita constitutis, haud arduum erit perspicere, quo usque animae super corpus imperium se extendat & quomodo quibusque mediis anima corporis actiones moderetur ab iisdemque vicissim varias impressiones recipiat. Scilicet systemati nervoso lege a sapientissimo Creatore sancita, ita praest, ut fluidi in illo contenti motum non tam producat aut illius causa existat, quam potius ut eundem ab aliis causis jam procedentem, regat motuque suo ad hanc vel illam partem magis quam ad aliam dirigat & ita æquilibrium inter partes cerebri, & que tensas tollendo motus voluntarios instituat. Itemque ut a motu huic liquido a causis vel internis vel externis impresso vel influxu ipsius a sanguinis in partes impetu aut retardato aut represso aut alterato, occasione commotarum hac ratione fibrillarum medullarium cerebri, varias passiones sustineat. Id quod brevissimis huc recidit:

- (α) Fibræ partium nervosæ a liquido nerveo, & vascula arteriosa hisce fibris interjecta a sanguine, alternis vicibus tensa continuo sibi obluctantur. Adeoque
- (β) Influxus nervorum succi temperat & moderatur sanguinis in partes irruptionem, &
- (γ) hæc

Sunt mere
mechani-
cae.

Actiones
mixtae.

- (γ) hæc vicissim impedit & alterat motum fluidi nervei.
vid. §. VIII. Quem dmodum igitur
(δ) anima undas nervorum ad partes dirigendo §. IX.
actiones corporis excitare, modificare aut turbare po-
test, ita
(ε) sanguis motu solito vehementiori concitatus aut ultra
modum expansus vascula distendendo, fibrillas nervo-
sas premendo & continuis pulsationibus cerebrum
ejusque fibrillas succutiendo, §. VII. contenti in illis
fluidi motum alterare aptus natus est,
quo ipso non possunt non in ipsa anima occasione illarum
motionum varii motus sive cogitationes exoriri. Itaque
nervorum succus est, utrisque & animi & corporis prouini-
scue motibus serviens, quo commercium illud continetur
quique bona invicem & mala transfert.

Succus ner-
vorum bo-
na & mala
invicem
transfert,

§. XII.

Et ita tandem planum atque apertum est, quid per
mentis & corporis æquilibrium intellectum velimus. Quid æqui-
librium
Scilicet nihil aliud quam eam virium corporis & ani-
mæ, in se mutuo agentium, proportionem,
qua cum libero partium fluidarum & solidarum
motu, & actionum integritas & mentis animi-
que vigor, conservatur. Enim vero vitæ integri-
tas consistit in partium fluidarum legitime, ratione mixtio-
nis, consistentiæ & quantitatis, se habentium per solidas con- Vitæ seu
actionum
integritas.
grue dispositas & constitutas proportionato motu. Adeo-
que quamdiu in corpore bene constituto liquores influentes
vitales motu libero, placido, æquabili & temperato feruntur
& mens præterea nullis affectuum cupiditatumque fluctibus
in diversum agitur, quin potius specie jucundi gratisque
perceptionibus perfusa, blando motu fluidum nerveum,
quod

quod noctu oculi citius imperium audit, excitat eoque per nervos diffuso, cor & alia corporis organa ad motus & actiones promptissima reddit: tamdiu optime se habet homo & sanitatem satis ex voto perficitur. Quamprimum vero sanguis alteratur & ratione mixtionis ac motus pervertitur & turbatur, vel ultra modum expanditur, non possunt non, vi supradictæ communionis, fluidi nervorum motus impediri aut turbari, nec non fibrillæ medullares cerebri & nervorum, insolita ratione, premi, pulsari, vibrari, atque ita vites animi atque vigor quodammodo debilitari, opprimi aut etiam, pro vehementia causarum, illius occasione extraordinariæ affectionis, extraordinarii & turbulenti in eo motus exoriti. Deinde, quando anima immoderatis effectuum motibus abripitur, fluidum simul nerveum, quod illa nutu suo solet dirigere, necessario inordinatis motibus cietur, partes ultra modum constringuntur sublataque naturali tensione fibrarum que flexilitate infirmantur & ad actiones inidoneæ fiunt, pori occluduntur, transpiratio insensibilis Sanctorianæ supprimitur, in summa perit æquilibrium inter solida oscillantia & liquida fluentia, & ita sparguntur multorum & periculosorum morborum semina.

§. XIII.

Hæc ergo, si probe consideraverimus, non mirabimur amplius tot & naturales & p. n. in homine effectus, qui destructo huic æquilibrio unice debentur. Cum enim pugnantibus maxime elementis constet, qua vivimus, machina, resque adeo diversæ arctissima unione consociata se mutuo in homine afficiant totaque ejus vita partium contranitentium motu absolvatur; nil sane mirum, si tot dissimiles atque inter se pugnantes motus & inclinationes ille sustineat motusque corporis animæ libertati officiant, voluntatem, dum videt meliora probatque intellectus, in deterima trudant & ita anima imperii, cui destinata erat, frena amittat, domina ac inheri-

Affectus
motum
partium
fluidarum
& disposi-
tionem ac
structuram
solidarum
maxime
immutant.

Dissimiles
atque pu-
gnantes in
corpore
motus &
inclinatio-
nes.

herilem conditionem missa serviat, quæque dare debebat jura cervice parata sæpe accipiat. Nil mirum, si ferventibus succis, cum calore & acrimonia in sanguine, crescat furor & temeritas in animo. Sensuum enim impressiones, motus, inclinationes, stimuli carnis illecebris & blandis lenociniis animam pelliciunt, serenitatem ipsius obnubilant, vires vinculis quasi impediunt eandemque invitam etiam & repugnantem inducunt: dum enim commotiones varias fibrillarum in cerebro excitant, protinus ipsis respondentes cogitationes & propensiones in mente oriuntur. Hæc est illa lucta inter carnem & spiritum. Ita lex membrorum, ratio & voluntas carnis & ex carne nata libido, spiritui i. e. menti divina veritate illuminatæ, secundum tenorem sacrarum literarum, semper & usque se opponit, neque hinc, verba sunt Excell. Bergeri, de Nat. Hum. L. I: c. I. p. 6. Opus esse intelligemus, ut praeter motus impulsusque corporeos, principium aliquod aliud & brutam quandam animam admittamus. Fieri enim, inquit idem ille Vir Naturæ consultissimus de Commod. Vit. sobr. p. 32. omnino debet, ut, quo magis corpus a temperie humorum recedit, hoc magis animus, eodem ipso Naturæ intemperatæ impetu a temperie morum recedat, eoque facilius, oblata levissima specie & offensa, in motus & perturbationes præceps rapiatur, hisque translato in corpus impetu, cum ista corporis intemperies, tum ea aucta intemperies quoque animi augeatur ipsa & confirmetur.

§. XIV.

Neque hinc longe petenda ratio est, cur qui gulæ sequuntur ingenium & non solum cibos conquisitissimos sanguini volatiliori generando aptos, sed & reliquos tanta copia ingerunt, quam natura, ex mente Sanctorii Med. Stat. S. III. Aphor. 9. nec facile coquere, nec digerere, nec perspirare potest, non solum sanitatem & vitam, sed & ipsius animi dotes & mores corrumpant? Nempe, quoniam illis sanguinis molles præter modum expanditur, his vero in succos copiosos

crudos & perspirationi minus idoneos degenerantibus vasā oppalentur, infaciuntur & sanguis crudior in hac vel illa parte congeritur, cumque sic utrobique vasā solito magis dilatentur, non possunt non nervi, qui arterias ubique comitantur, vi quaquaversum nitentis in latera sanguinis, premi, quo ipso, cum vitale in illis liquidum, quod proximum animæ instrumentum est, pressioni fortiori resistere nequeat, æquilibrium inter utrumque & sic æqualis animi & corporis proportio cum dispendio vividi mentis vigoris tollitur. Et sic, quod est apud Horat. L. II. Satyr. II. 77.

corpus onustum

*Hesternis vitiis animum quoque prægravat una,
Atque affigit humi divinæ particulam aura.*

Idem evenit, ubi ex suppressa perspiratione Sanctoriana, quantum in pluribus unica die naturali evacuatur, quantum per alvum quindecim dierum cursu, Med. Stat. S. I. Aph. 60. quæque, in aëre quidem Italo, cæteris paribus & assumtorum æquat, Aphor. 6. atque omnium sensibilium excretionum aggregatum superat, cruditatibus & nimia sanguinis copia vasā sunt oppleta.

§. X V.

Simili prorsus modo omnes humores sic dicti spirituosi inebriantes, & omnia quæ sanguinem expandendi atque concitandi vim habent, narcotica, opiata (quorum in corpus agendi modum post acutissimum Pitcarnium Diff. de Circul. sang. in animal. genit. & non genit. Celeb. Frid. Hoffmannum Diff. de vera opiatorum agendi ratione, egregie non minus quam vere per rationes & experimenta demonstratum dedit, nec nimis sæpe, nec nimis valde laudatus Bergerus de Vi Opii rarefaciente) sanguinis nervorum succo contranitentis pressionem augendo, illius influentis motum liberum quodammodo præpediunt, unde non solum partes, in primis musculi, quorum validæ tensioni corporis robur innititur, debilitantur,

Inebriam-
ma tollunt
æquili-
brium,

tur, sed etiam cerebro ejusque fibrillis gravatis, oppressis, arteriarumque insolitis pulsationibus vibratis, animæ vigor, qui naturali cerebri tensione & temperie continetur, perit, ortisque ita inconditis impressionibus, mens loco movetur, tandemque accedente, ob defectum influentis liquidi, organorum sensoriorum relaxatione, somnus obrepit, sed turbulentus atque insomniis plenus, cum confusis in cerebri fibris agitationibus, ab extraordinaria modo dicta pulsatione, confusæ in mente cogitationes respondeant.

§. XVI.

Id, quod alia ratione se habet in somno naturali placido, in quo sublatum aliquo modo mentis & corporis æquilibrium non minus auctæ sanguinis pressioni atque inde destructo fluidi arteriosi & nervosi renitentis æquali nixui debetur. Id, quod ex eo quodammodo clarum est, quoniam in somno, relaxata texti nervosi constrictione, totus corporis habitus ab arteriis hinc magis expansis atque distentis intumescit (quod vestigia a vinculis laxioribus post somnum in cunctis relicta evidentissime docent) atque apertis poris ac meatus, tempore vigiliarum duplo magis constrictis & coangustatis, perspiratio duplo quoque major sit, teste *Sanctorio*, *Stat. Med. S. IV. Aph. 2.* Verum, ut plenius hæc intelligantur, observamus: vigilias nos appellare illum humani corporis statum, quando fibræ medullares cerebri & nervorum a copia & motu succi nervorum variisque, hunc excitantibus, animi cogitationibus ita tenduntur, ut vividæ nervorum undæ sanguini in arteriis prementi, validiori nisu, resistere, proque mentis arbitrio ad partes dirigi & motus externis sensoriis ab objectis impressi ad commune internum, reflexa fluidi directione propagari possint atque ita, libero interanimam & corpus commercio, motionum ac sensuum actiones vigeant. Quando vero dissipatis nervorum undis, vel mente a seriis causâ cogitationibus conquiescente, fibræ a vivida illa intentione somni,

remittunt atque ita, sublato æquilibrio & sanguinis prævalente expansione, aliquo modo pressæ tantum non transmittunt, quantum ad motus & sensus rite obeundos requiritur, necessum est, hos feriari tantisper, *αισθησεων περιττον* ab operando suspendi, languente cerebro vim quoque & attentionem mentis hebetari, atque ita animi & corporis æquilibrium quodammodo tolli. Sed cum moderata sit hæc cerebri & nervorum pressio pulsuque cordis & sanguinis circuitu sedatiore omnia in corpore humano sueta ratione procedant, hinc anima a corporis commercio & contagione libera in se quasi recedit, nullisque, quæ inquietam illam reddere aut conturbare possent, insomniis exagitatur.

§. XVII.

Hinc quoque facile ratio deducitur, cur statim a prandio animus quasi aliquo modo obnubilatus ad meditationes serias minus idoneus sit, & cur ad somnum tum temporis corpus propendeat? Distentis enim ab ingesta ciborum copia primis viis, ventriculo & intestinis, arteria magna descendens, aliique ipsius ramuli quodammodo comprimuntur, quo ipso, impedito liquidi contenti motu sanguis ad caput compellitur, majorique copia cerebrum obruit & aggravat; ut de chylo, sanguinem expandente & in vas. minim. retardante, nil dicam. Unde sublato fluidi sanguinei & nervei in cerebro æquilibrio, præpeditur hujus ad partes liberior influxus, & non solum mens a suo vigore, sed & organa corporis a vivida tensione aliquo modo remittunt, quo ipse languidus duræ mortis frater obrepit.

§. XVIII.

In statu
p. n. febri-
bus &c. in-
primis de-
struitu
æquili-
rium..

Nullibi vero destruatum illud mentis & corporis æquilibrium evidentius perspicitur, quam in statu præter naturali, ubi, in variis corporis humani affectibus, cum primis in febribus, sanguis, vel ad unam alteramve partem, a quarundam partium obstructione aut spasmodica contrac-

ctione

ctione congeritur vel nimium ratesit & æstuat: inde enim fibris medullæ cerebri vel in toto vel in parte compressis, nervisque, ob denegatum fluidi nervorum influxum laxatis, originem ducunt, non solum omnes sic dicti morbi soporosi, quinque maxime affines, apoplexia, paralysis, vertigo, mania, quam rectissime *Hippocrates*, *Tr. de Man. Epist. addit. a cerebro* nimium calefacto & p. n. moto deducit, cum eo tempore homo sapiat, quo cerebrum quiescit: sed etiam febricitantium deliria; non potest enim non fieri, quin ubi transitu nervorum undis præcluso, commune sensorium totaque cerebri compages ab humorum æstuantium irruptione comprimitur & concutitur, ipsum illud liquidum insignem turbationem sustineat & confusæ fibrillarum modo p. n. distentiarum agitationes ineptis & inconditis ideis occasionem præbeant. Ita quoque deliria in Tarantatis & demorsis a cane rabido commode deducuntur, quamvis aliæ circumstantiæ hic accedant. Verissime laudatissimus *Bergerus*: si fiat, inquit, ut vehementior humorum æstus ipsam cerebri fibrosam compagem invadat, eo que immutata ipsius naturali temperie, qua mens rationem suam exercet, cum æstus interioris, tum exterioribus arteriarum imperitis impulsibus totum musicum cerebri opificium committatur, de imperio suo statuque mens dejicietur & amens homo atque insaniens reddetur. *Diss. de Vi Opii rarefacient.* p. 20.

§. XIX.

Idem illud Äquilibrium destruitur, ubi sanguinis lentescens vitio, ob suppressam transpirationem *Sanctorianam*, *Med. Stat. S. VII. Aphor. 14.* vel aliis de causis, ipsum quoque nervorum fluidum lentorem contrahit & a vivo suo vigore dejectum sanguini spissiori ad caput congesto & segnius promoto, pro eo ac debebat, reniti non potest, vel quando, ob lymphæ hinc inde interceptum motum, defluxiones sic dictæ catarrhales cerebri aut nervorum fibras premunt & regularem in illis liquidi motum præpediunt, hinc iudicem sæpe affe-

Ob conge-
tionem vel
ratefactio-
nem san-
guinis.

Ob fluidi
nervei len-
torem.

ctus soporosi & accedente cogitatione fixa ac imaginatione rei timendæ vel dolendæ Melancholia & Mania. *Melancholicorum enim decubitus vel siderationem, vel convulsionem, vel maniam &c. parunt.* Hippoc. L. VI. Aph. 56. quoniam eo ipso cerebrum, vel totum, vel ex parte p. n. modo comprimitur & genus nervosum afficitur, pluribus id demonstrante Laurent. Bellini, de *Morb.* Capit. p. m. 519. seqq. confer. Barthol. de *Moor*, veris æconomiae animalis seu humanæ *Principiis innix.* *Patholog. cerebri delineatio.*

§. XX.

Qua ratione mentis & corporis æquilibrium in Epilepsia similibusque convulsivis morbis sublatum eidem sanguinis vasa distendentis nervorumque fluidi resistentis destructo æquilibrio debatur, iis ignotum esse nequit, quibus Belliniana Morborum Capitis Theoria, nec non ea, quæ laudatus modo de *Moor* huc contulit, perspecta sunt, ut hisce fusius exponendis immorari haud necessum esse ducamus. Illud tamen adhuc observamus, quod exinde planissima evidentia consequitur: magna sane in Medicina interesse, ut non solum structuram corporis humani, sed & motuum proportionem probe exploratam habeamus. Deinde, quemadmodum ad sanitatem ita quoque ad præstantiam vigoremque mentis tuendam multum præsidii in eo positum esse, ut legitimo sexerum, ad sanitatem tuendam morbosque inferendos indifferentium, ad vitam tamen protrahendam maxime necessariarum usum, justa sanguinis temperies conservetur & motus uterque intestinus & progressivus intra Naturæ mediocritatem continetur. Tertio nil magis, uti corporis, ita quoque mentis sanitatem labefactare & illam utriusque iostabili turbare quam nimiam repletionem, aut sanguinis plus justo ebullientis expansi & arteriarum latera extrudentis coque fibrillas cerebri & nervorum prementis atque pulsantis nisum. Unde apparet, quam sibi parum prospiciant, qui depo-

deposita humani sensus temperantia inebriaminibus & potibus spirituosis corpus replent, sanguinem inflammant, cerebrum oppalent, rationis domicilium impugnant, & non solum insignem generi nervoso labem in tabem, hydropem & illam corporis carnificinam, querulam arthritidem ipsamque mortem tandem desinentem affricant, sed, quod potissimum est, perpetua vertigine judicii lumen extinguendo illius partis, qua homines sunt, usu, se ipsos privant. Hinc deterima ingeniorum pestis Medicis audit ebrietas ; & hæc sine dubio gravissima ratio fuit, cur Carthaginenses legibus ca- Carthagi-
nensium
Princeps
abstemius.
verint, ne Princeps eo anno, quo imperaret, vinum biberet, & quamobrem *Plato, de legib. II.* pueris ad duodevigesimum usque annum, & *Aristot. de somn. & vigil.* cum infantibus, tum nutricibus vino interdixerit; nec non, cur prudentissimi quique ex Medicis opii & opiatorum usum tenellæ ætati dissuadeant, scil. ne, aucto calore expansivo & pressione humorum cerebro cum genere nervoso molli & tenerrimo vis inferatur & ita non tantum Epilepsiaæ, quæ ob illam cerebri mollitiem & nervorum debilitatem infantili ætati adeo familiaris esse solet, ut *νόσον παιδίων καὶ ἐξοχῆν* vocetur, subitæque sæpe mortis detur occasio, sed in primis, vis rationis, labefactato ejus domicilio tandem periclitetur. Et hinc quoque probe cavere prudentis erit, ne pharmacis intempe- Pharmacis
non facile
turbaña
natura.
stive adhibitis, & utriusque fluidi, & animi ac corporis æquilibrium pervertat; ut eo minus mirum, si sanitate misere excidant, qui eandem sæpe nimium concupiscunt & in secunda valetudine, vel ejus latitudine, adversæ præsiis Naturam turbant, nullaq; cogente necessitate sanguinis motiones subsidiis pharmaceuticis vel incitant vel cohibent, ac ita nervorum & arteriarum, mentis & corporis nisum ac nutum proportionatum subducunt. Eo sensu optima medicina est, nulla medicina uti.

Abstine & efficies quod medicina nequit.

§. XXI.

Æquili-
brium a
parte men-
tis subla-
tum.

Fluidi ner-
vi exis-
tentia probata.

Ex hisce jam satis planum esse putamus, quomodo a parte corporis illa operationum proportio immutetur? restat, ut exemplis quibusdam declaremus, qua ratione anima affectibus excitata æqualitatem sæpe reducat, vel a parte sui quoque insigniter pervertat. Hic vero ante omnia observamus, quod supra §. VIII. jam inculcavimus, (α) nullum animam in corpore motum, nullam functionem administrare, nisi miniculo fluidi nervorum, quod spiritum animalem veteres appellabant, cujusque sub eo nomine existentiam & rationibus & experimentis omni exceptione majoribus extra controversiam collocatunt Viti perspicacissimi, Schelhammerus, Disquisit. de spiritib. Animal. Bohnius, Progr. quo experimentum, quod monente celeb. Bellino, in nervis phrenicis aliquoties instituerat cum orbe erudito Ao. 1687. communicavit, Elias Camerarius, Dissert. de Spirit. Animal. Stat. Nat. & P. N. occasione experim. Bellino Bohniani, aliique. Quod enim de fictitiis ipsius proprietatibus & motionibus ipsoque nomine rectissime monuerunt recentiores, illud ejusdem existentiae fraudi esse nec potest nec debet; tantum abest, ut cum nomine rem ipsam risu explodendam censemus. Deinde, quod res ipsa loqui videtur, (β) animi motus mediocritatis leges supergressos nimisque concitatos, vi arctissimæ unionis, liquidum nervorum, necessitate mechanica, quemadmodum supra expositum est, in partes jamdum influens, impetu superaddito ita pellere & pro ratione circumstantiarum varios partium extra ordinem motus, convulsiones, spasmos, constrictiones excitare. Tum (γ) quod experientia manifestum est, esse in quibusdam hominibus liquidi nervosi ad animæ imperium ita obnoxium fluorem, ut imaginandi vi, ad certam partem, ad quam fixa cogitatio intenta est, determinari possit.

§. XXII.

Præterea id quoque, a prudentioribus optime demonstratum, admittimus: omnes sic dictos animi affectus sive motus, ad duas classes commode referri, propensionem, cupiditatem, sive amorem & aversionem, sive odium. Nempe, voluptas & dolor & quæ eorum causæ sunt, bonum & malum, cardines sunt, in quibus affectus nostri vertantur. vid. doctissimus *Lockius*, de *Intellect. human.* L. II. cap. XX. 3. Anima versatur circa objectum vel bonum, idque sive verum sive apparet, vel malum. Illud animam specie jucundi allicit, excitat & lætitia perfundit, quo ipso motus nervorum succi intenditur, ut promptius influat, propellatur, &c, ut Naturæ consulti loqui amant, intuitu objecti grati in elatere expandatur, nec tam ab interioribus ad exteriora (quod de sanguine tantum non vero spiritibus seu nervorum fluido verum est) quam potius ad omnia corporis organa, præ aliis tamen in cor, neglecto quasi aliquo modo, ob animi contenti & imminentium ab extra molestiarum cura vacantis securitatem, exteriori corporis habitu; qui hinc ob auctam sanguinis pressionem & mutatum quodammodo æquilibrium moderate laxatur. Et sic *lætitia diastolen & systolen reddit faciliores*. *Sanctor. Med. Stat. S. VII. Aph. 48.* sic nihil magis liberam reddit perspirationem, quam consolatio animi, ib. Aph. 6. consolatio quacunque de causa fiat, aperit meatus & largam facit perspirationem, ib. Aph. 19. auctor cordis impulsu & laxiori reddito exteriori habitu. Atque hinc etiam cor in specie exultare rectissime dicitur: hinc sanguis valido cordis impulsu ab interioribus ad exteriora pellitur totusque corporis habitus fit floridior & auctor sanguinis in orbem motu omnes illæ a mente, gaudio reflecta, pendentes utilitates & effectus in corpore proveniunt. Inde etiam, corde repentino gaudio aut immodica lætitia celerrime moto & quasi oppresso, sive ultra modum con-

Blinæ affectus
etuum clas-
ses.

In gaudio
spiritus nou-
ad exterio-
ra, sed ad
cor propel-
luntur.

stricto, oriuntur tragici illi effectus, quando exempla non una prostant eorum, qui effuso nimis gaudio fuerunt exanimati, quemadmodum de Chilone Lacedæmonio, Sophocle, binis mulieribus Romanis, apud *Plinium*, *L. VII. c. 47.* & *Li-*
vium, Histor. ab Vrb cond. L. XXII. Fouqueto, Gallo, apud
Pechlin. L. III. Obs. XXVII. aliisque, apud mox citandum
Langium, de Mort. ex Affect. constat. Hoc vero, scil. malum,
In terrore
non repel-
luntur, sed
in exter-
hab vehe-
mentissime
influent, animam terret, unde, dum id aversatur & fugit, consilii quasi
 inops fluidum nerveum nutu suo in partes subito, vehementer,
 quandoque etiam inordinate impellit, quasi, constricto
 exteriori habitu, corpus suum periculo ereptura & contra
 molestos insultus obfirmatura; quo ipso, sublato inter nervo-
 sam & arteriosam contextioinem æquilibrio & constrictis
 cum partibus vasis sanguineis, sanguis ad interiora repellitur,
 venæ & arteriæ detumescunt; unde rigor, tremor, pallor, non
 aliter ac sub initium paroxysmi febrilis: dumque nervorum
 liquidum pari influxu & æquali vehementia in fibras cor-
 dis, irruit, non potest non cor validius constringi & ita
 sanguis fortiori impetu elidi, cumque sanguis a circumferen-
 tia repulsus sanguini a corde propulso occurrat & obnittatur,
 motus in se ipsum recurrit atque reflectitur, unde anxietas,
 palpitatio cordis, spirandi difficultas, pulsus frequens, plane
 ut in febribus intermittentibus, quarum etiam rationem for-
 malem in simili sanguinis, a corde expulsi, & a partibus exte-
 rioribus simul repulsi, contrario & confuso motu consistere,
 deductis inde modo evidenti & intelligibili omnibus sympto-
 matibus facile demonstrare possemus, si ratio instituti per-
 mitteret.

Terror non
secus ac
motus fe-
brilis cor-
pus concu-
git. Verissime dixit *Mæbius*, metum & terrorem cor
 nostrum omni virtute spoliare aut potius opprimere, hono-
 remque ac rigorem, febrili similem, inducere. *Instit. L. II.*
P. II. cap. VII. imo affirmare non dubitamus vehementem
 terrorem verum esse insultum febrilem, & hinc facile reddi
 potest ratio rei notissimæ, ad quam, ut eruditus Medici proprius
 animum

animum advertant, exoptat acutissimus Schelhammerus, de Febribus. S. II. §. 32. quando scil. ad conspectum rei, a qua animus noster refugit & abhorret vehementer, concusso subito terrore corpore, per labia & in superiori ad nares interstitio pustulæ vel sanissimis non multo post erumpunt, quod vano saepe etiam ex metu, quando spectrorum & lemurum terricu-
lamentis imbecillum animi, etiam in insomniis, percelluntur, ^{tore pustu-}
accidit. Eadem nempe hic ratio est, quæ in febribus: cum ^{lx in labiis} motu humorum contrario irritata natura insurgat & si quid forte inæquale minusque sanguini contemperatum in corpore invenitur, occasione laborantis animi motu critico, non secus ac in febribus, expellat. Pari ratione id quoque evi-
dentiissime hinc deducitur, cur terror & vehemens animi tur-
batio febribus malignis viam aperiat, atque contagio aditum ^{malignæ e}
paret? hoc enim sanguinem terrore exagitatum & febrili commotione jam concitatum, eo facilius turbare atque per-
vertere potest. Item, cur terror antecedens febrium saepe &
ideam & ingenium mutet, malignamque iisdem affricet la-
bem? nec non, cur die præsertim critico accedens crisi tur-
bet, exanthemata retropellat atque ægros internecioni tra-
dat? quoniam, constrictis exterioribus, humores repellun-
tur, pori clauduntur, evacuationes sistuntur & motus humo-
rum aliquanto liberior denuo pervertitur.

§. XXIII.

Ex dictis ergo satis perspicuum esse videtur, quod, licet in prima affectuum classe, sanguis aucto cordis motu ab interioribus ad exteriora, in posteriori vero ab exterioribus ad interiora spasmodica partium constrictione pellatur, idem tamen de nervorum fluido sive spiritibus non possit dici, cum nisi nos omnia fallunt, ipsæ, quæ circumstant, conditiones clarissime ostendant, in prioribus, ubi anima circa bonum versatur, fluidum nerveum, neglecto quasi exteriori habitu, cui tamen tantum accedit, quantum ad naturalem tensionem

sufficit, in cor in primis impetum suum exercere; in posterioribus, ubi imminente quasi malo mens terretur, vehementius ab interioribus ad exteriora propelli, tantum abest, ut, quæ communis est sententia, spiritus in gaudio ad exteriora ferantur, in terrore vero sive metu revocentur, figantur aut ratione elateris comprimantur. Sane omnia, quæ in hominibus terrore perculsi apparent phænomena, rigor, tremor, pulsus frequens & funesti, qui eundem saepe sequuntur effectus, spasmi, epilepsia, convulsiones, influxum spirituum vehementiorem inordinatum magis, quam retrocessionem non

Affectuum
effectus ab
impulso
animæ de-
terminato
dependent.

Eorum vis
medica,

Vis inferer-
di morbos
& ipsam
mortem.

utrobique ad impulsum animæ determinatum, eumque prout objecta sunt vel bona vel mala, & quidem vel magis vel minus talia, præterita, præsentia, futura, varium; modo blandum, placidum, modo impetuosum, modo successivum, modo subitaneum, modo æquabilem, modo confusum tumultuarium &c. res recidit. Hinc eo minus mirum videri debet, si animi *παθήσεις*, quorum alias, sicut in concitatione animæ ad virtutem, stimulum & calcar addendo, ita quoque in negotio sanitatis varios naturæ motus excitando & moderando, non contemnendæ partes sunt, (corpus enim, inquit *Sanctorius*, marcesceret & otio periret sine animi motu, *S. VII. aph. 40.*) adeo contrarios in corpore nostro effectus producant & modo vi medica polleant, maximosque morborum insultus compescant, vincula expediant, vid. in primis *Christ. Job. Langii Dissertat. de Animi commot. vi medica Oper. P. III. p. 27.* modo non solum magnorum morborum causæ sint, sed & hominem in extremum vitæ periculum conjiciant & subitaneæ saepe morti tradant, vid. Ejusdem *Dissert. de Mortuis ex Affectibus ibid. p. 34.* nec non *Frider. Hoffmann. Archiatr. Regii Boruss. Dissert. de Animo sanit. & morb. fabro.*

S. XXIV.

Scilicet quamdiu ratio dominatur atque propensiones illas & motus freno moderatur, blandis illorum impulsibus liquidum torpidum forte & lentescens, excitatur, compellitur & pro re nata vel ad cor vel ad exteriorem habitum determinatur, quo ipso mutatum, vel ob constrictiōnem partium spasmodicam, vel ob arteriarum a sanguine nimis rarefacto immodicam distensionem & pressiōnem, æquilibrium restituitur; unde pristinam tensionem debitumque cum tono robur nocte partes, instaurato motu tonico vitali materiam inæqualem morbosam excutiunt & plurimum sæpe infirmitatum causas dispellunt. Quando vero animus subito & ex improviso turbatur & extra justæ proportionis limites vagantur affectus, mobilissimum nervorum liquidum cum impetu & vehementia propellitur; unde quidem aliquando accidit, ut eo ipso validiori impulsu gravissimorum morborum vincula laxentur, quemadmodum de *Cræsi* filio natura muto apud *Herodotum* legimus, cui conspecto occisore in Regem Parentem irruente, metus & ira linguam vinculis expedivit, atque usum loquelæ impertivit. Prout etiam de febricitantibus quibusdam ex improviso in flumen præcipitatis constat, quod hac ratione solo terrore fuerint morbo exsoluti; aut de podagricis in periculo constitutis, qui metu impellente impedes aliquando se conjecterunt atque ita periculum ac morbum superarunt; sicuti plura similia, interque ea multum faceta exempla congesit, præter doctissimum *Pechlinum*, *Observ. L. III.* laudatus modo *Langius*, de *Anim. commot. vi med.* plerumque tamen, mutato æquilibrio turbatoque magis vel minus primo corporis mobili, omnes, qui idem debentur, motus, totusque adeo homo turbatur, actiones infirmantur, pervertuntur, supprimuntur, extinguuntur. Idque, uti in omnibus affectibus justo vehementioribus accidere potest, ita in terrore in primis observatur. Quid mirum

Terrore
linguæ vin-
cula laxata.

enim, si, quando incusso vehementi & subitaneo terrore succus nervorum subtilissimus in reticulum nervosum per omnem corporis habitum expansum atque una in ipsius cordis fibras vehementissime impellitur, fortissima partium exterorum constrictione validaque simul cordis contractione fluidum sanguineum simul & subito repellitur & expellitur, motus ille contrarius se ipsum extinguat? Quid mirum, si terror drepente incussus non solum infantibus, sed etiam adultis epilepsiam & convulsiones saepissime inferat? Quid mirum, si constrictis repento terrore partibus sanguinisque motu represso, haemorrhagiæ, vel menses sistantur aut sanguinis e vena secta effluxus prohibeatur? si affusa nuchæ ex improviso aqua frigida, bombardæ explosio, clamor stentoreus similiaque terriculamenta contra haemorrhagias optata remedia sint? si in verbis, ubi phantasia simul movetur, ad morbos depellendos tanta vis saepe lateat? Quo pertinet illud apud Celeb. *Morphium, de Scyph. Vitr. per cert. hum. voc. son. fract. p. m. 232.* ubi cum circumstantes frustra laborarent in sistendo ægroti sanguine & pene extrema instarent, Agyrra quidam accedens inopinato illos allocutus: *Quid miserum vexatis remedii vestris, illi jam moriendum est:* incusso hac voce ægro terrore sanguinis fluxum statim cohibuit eundemque mortis faucibus eripuit. Quid mirum, si constrictis in terrore a subitaneo & impetuoso liquidi nervi, influxu, una cum aliis, vesicæ urinariæ & intestini recti motricibus fibris, contenta, urina & feces præter voluntatem exprimantur? unde illud etiam deducitur, cur fœminæ illi, quam *Aet. Philos. Anglic. ab Oldenburgio edita p. 550.* sistunt, cum tonitru audiretur, ob terrorem sine dubio, semper laxata alvus crebræque fuerint vomitiones (quo forte bilis e vesicula simul spasmatica constrictione, expressa multum contribuit) quales nec a fortissimis effici medicamentis possunt. Item, cur in illis,

haemorrhagia curata.

Ab audito
tonitru la-
xata alvus.

de

de quibus Excell. *Pechlinus*, L. III. Obs. XVIII. non secus ac
isti apud *Juvenal. Satyr. XIV. v. 198.* cui

- - - *trepidō solvebant cornua ventrem*

Cum lituis audita,

metus in alvum semper despumaverit? Cur Duci Ferrariæ apud *Brassavol. Tr. de purgant. c. 9.* cum jussu Michaelis Savanaroli nudis pedibus supra pavimentum alabastrinum aqua frigida prius conspersum incederet, triduana alvi stypticitas, nondum quinquaginta passus promoto felici effectu fuerit soluta? Cur ubi, corpore calente, manus frigidæ immittimus Natura ad urinam pellat? territo enim frigore sensu, quemadmodum totius corporis, ita, pro ratione circumstan-
tiarum, in specie intestinorum & vesicæ urinariæ fibræ con-
stringuntur & ita contenta expelluntur. Hinc est, quod, si dor-
mientis cuiusdam manus in aquam frigidam immergatur,
insecius stragula commingat. Quo pertinet illud etiam a
laudatissimo *Pechlino* notatum, quando *Thomas Campanella*
de Venusia Principe refert, quod cum alvo esset lenta & ob-
stinata, verberibus, a servo ad id conducto, inflictis, & sic
metu arte conflato ad eam ducendam fuerit cogendus, pari
fere ratione ac illi veneris nepotes apud *J. H. Meibomium*, tidiſ ſolu-
de flagror. uſu in re venerea, crudelibus flagris ad damnosam ^{ta.}
voluptatem ducebantur. Quid mirum denique, si alapa aut
colaphus, incusso terrore, accensa ira motaque phantasia Alapæ &
colaphi
vomitum, fatuitatem, epilepsiam, apoplexiā, abortum miri eſſe-
tus.
imo ipsam aliquando mortem induxit, quemadmodum plura id generis exempla ex *Hildano, Deckero, Valleriola, Beni-
venio, Amat. Lusitano, Foreſto, Horat. Augenio & Carpzovio* coll-
egit Celeberrimus *Franckus a Franckenau, de Alap. & Co-
lapb.*

§. XXV.

Possemus simili ratione aliorum animi pathematum effectus persequi, nisi brevitati studeremus atque ex dictis
cuivis

Æstus cogitationum dolorum remedium.

Anæsthesia Stoicorum.

cuivis de reliquis judicare integrum esset. Cæterum in illis sublatum mentis & corporis æquilibrium satis quoque evidens est, qui phantasæ suæ potentes, æstu cogitationum, eandem, quo volunt, abripiunt & conversa in se ipsam corporis que vinculis subducta quasi anima asperiores etiam dolores frequenti atque intenta meditatione vincunt. Nulli non notum est, quid hac in parte jactaverint Stoici *anæsthesias* cœusque professi, ut in eo virtutis summam collocarint, si, obfirmato animi impetu velut corpore erepti dolores vel non perciperent, vel perceptos occultarent & in acerrimo cruciatu illud *Arriae, Cecinae Pæti uxor*, *Pæte non dolet*, suum facere, aut cum *Anaxarcho* in mortarium a Nicocreonte conjecto exclamare possent: *tunde, tunde, Anaxarchi vasculum tundis, Anaxarchum non tundis.* *Diog. Laërt. in Anaxarch.* *De Torquato Tasso* atque *Cardano* refert *Pechlinus l. c. Obs. XI.* illius tantam sæpe fuisse ecstasi, ut corporis fuerit oblitus: hunc vero hominem φαντασία a podagricis sæpe dolotibus forti imaginatione contentoque animi opere se liberasse. Sane a ratione adeo alienum non videtur, animam a corpore quasi abductam aliisque operationibus impensis occupatam sensuum impressionibus percipiendis aliquando non vacare, quamvis, uti recte monet laudatus vir χαριτατος, non quivis temere indulgere sibi possit hanc libertatem, cum ipsa illa imaginandi vis aliquibus Naturæ prærogativa, paucis admodum cultu aut arte constare videatur. Interea non inepit eruditus Medici ab illa per nimiam animi occupationem inducta αναιδησία rationem deducunt, cur literati alvum plerumque obstructam habeant & ad malum hypochondriacum procliviores sint, in primis cum ita reliquæ etiam actiones quodammodo infirmentur. Quid quod seria animi contentio & ad res insuetas applicatio singultum, vomitum, dolores, sæpe stiterit? unde perspicimus etiam, quantum animus curis detentus medicamentorum virtutes sæpe possit alterare aut enervare.

S. XXVI.

Alvus ob-structa eru-ditis molesta unde?

§. XXVI.

Quemadmodum vero hic, aversa quasi a corpore anima, ~~consuetudine~~ destruitur, ita non minus id evenit, quando ad illud nimis est conversa & fortis imaginatione nervorum fluidi Vires imaginationis ad certam partem determinando, varios eosque mirandos saepe in corpore effectus producit. Miraculo proxima sunt, quae de viribus imaginationis tradunt Auctores, *Erasmus*, *Licetus*, *Fienus*, *Ebelius*, aliisque, quorum tamen, in quantum vera narrantur, non adeo difficilis explicatu ratio est, modo ad illud mentis in corporis motus, quod nutu exercet, imperium & ad promptissimum mobilissimi nervorum fluidi obsequium animum advertamus. Id enim subtilissimi fluidi genus influxu suo omnium in corpore actionum auctorem esse exploratum habemus. Animam quoque nuru suo ad partes illud dirigere posse, non minus nobis perspectum est. Quidni igitur, ubi fortiori imaginandi vi impulsu validiori partes, de quibus anima sollicita est, constringit, concutit, disturbat, ejusmodi effectus producere posset? Dicit hoc atque egregie illustrat sudor voluntarius *Oligeri Pauli*, doctissimi quondam *Simonis Pauli* filii, cuius tanta fuit, a primis annis derivata, voluntatis alacritas & virtus, ut pro arbitrio fluida ad manus dirigere & illas modo sudore stillantes, modo siccas, cessante voluntatis imperio, proferre potuerit; hujusque facilitatis experimentum & coram Augustissimo Danorum Rege Friderico III. in prima juventute & postea ultra triginta annos natus coram magno *Bartholino*, teste perspicacissimo, edidit. vid. *Act. Haffniens.* Vol. IV. Obs. 82. Neque hinc adeo arduum erit causam invenire, cur quis, viso, odore percepto purgante vel vomitorio, aut si quis ad imaginariam nauseam proclivis rem foedam sibi que in primis adversam conspicit, aut de ea per aliorum figmentum audit, vel illius quondam visae recordatur; si v. gr. pilum in cibis invenit, vel inventum ab aliis

videt, aut commemorando saltem accipit, vomitum aut alvi fluxum patiatur. Item, cur, secundum sæpius laudatum *Pechlinum*, L. III. Obs. XIII. purgantium effectus nisi conscientia voluntate propinentur, vel nulli sint, aut eo convertantur, quo fixa cogitatio vel utentis præsumtio illos inclinat, atque ea ratione in contrarium quoque medicaminum aliorum facultates ab imaginatione ad illum effectum determinantur quem quisque sibi animo, certo eo atque obstinato fingit? Cur a sola imaginatione orta sæpe purgatio? Cur & quomodo illa medicaminum vires determinet? Exempla prostant apud Auctores modo citatos, nec non *Bartholin.* Cent. V. Hist. 54. *Borrich. Act. Med. Haffn.* Vol. V. Obs. 49. 50. *Manget. Bibliothec. Med. Pract.* T. II. p. 1067. in *Miscell. Nat. Cur. Germ. Ann.* 1676. 77. Obs. 146. & 238.

§. XXVI.

Idiosyn-
cras. ratio.

Huc quoque pertinent tot idiosyncrasiarum sive specialium, natura insitarum, proprietatum exempla, ubi quidam certas res, vel plane aversantur, vel nimium appetunt. Harum enim potissima ratio in eo est, quod, ob singularem organorum dispositionem, vel connatam, vel consuetudine contractam, certæ impressiones animam afficiant & prout illæmenti, vel gratæ, vel adversæ sunt, ea vel commulceatur, vel indignabunda insurgat, variisque proin motibus, iisque vel blandis, placidis, vel impetuosis, quos similes fluidi nervi ad partem quandam determinati motus sequuntur, concitetur. Neque hinc spirituum retractio aut aversio, quod vulgo volunt, hic in causa est, quin animi potius molesta sensatio atque hinc oriunda indignatio. Illos enim non tam retrahi, quam validiori motu influere, effectus spasmodici, vomitus & similia accidentia testantur. Præterea, anima succum nervorum quidem impellere, sed non revocare, aliorsum determinare & quodammodo abstrahere, sed non retrahere potis est.

§. XXVII.

§. XXVII.

Vividiori quoque imaginationi inque firmissimam Amuletorum spem erectæ phantasiæ debetur vis & efficacia periaptorum, amuletorum torque Abracatabra *Tralliani*, quæ uti magicam superstitionem sæpiissime sapiunt & nil minus plerumque sunt, quam res, unde tantillum levaminis possit proficisci, ita insigni & exoptato effectu aliquando se commendant, sola animi fidentis intentione & fluidi nervosi fortiori ad partes impulsu; vividius enim ita nactæ robur facile morbi causam excutiunt: atque adeo, secundum illud *Avicennæ*, fiducia, quam æger de medicamento concipit, & arti & consilio & omnibus Medicinæ instrumentis sæpe præferenda est. Phantasia metu & horrore perculsa morbos potest inferre, quidni eadem obfirmata & ad optimam spem exardescens morborum insultibus posset obniti eosque repellere? Quamvis præterea fallacia non causæ ut causæ sæpiissime subdit, cum, quem interea temporis, dum spes ægrum fovet & patientiæ jugo, quod alias excutere videbatur, alligatum tenet, naturæ vigor atque bonitas vicit morbum, inepto & inutili periapto sublatum existimamus. Lepidissima est historia, quam Celeberr. *Ebelius*, splendidum Academiæ nostræ quondam decus, *Tr. de Virib. Imagination.* de Parocho, in Wetteraviae quodam, prope Friedbergam, pago refert, cui, cum Prætor rusticanus, homo festivus, intempestive desideranti, ad dentium dolorem depellendum, schedulam per novendum (ineptias ineptiarum! intra novendum solius ope naturæ malum poterat percurari) collo appendendam & postea versa facie, non retro respiciendo in flumen abjiciendam felici effectu præscripsit, cui sequentia & quidem obscoena verba idiomate germanico erant inscripta: Teuffel reiß dem Pfaffen den Zahn aus und sch. ihm in die Lücke. Huic non nisi infelici eventu dissimile est, quod ex Roberto Talbor, Anglo, *de Caus. & Curat. intermitt.* allegat Xæstes & Schel.

Schelhammerus, de Genuin. Febr. curand. Method. ubi acceptum a vetula periaptum paucis quidem diebus sanitatem ægro reddiderat, sed cum præter inhibitionem, postea sequentia verba eidem inscripta deprehenderet: *Ague fare vwell, till vve meet in hell,* h. c. Febris vale, donec in inferno nos revisamus, adeo fuit perterritus, ut cum vi & violentia recrudescens malum non multo post moerore confitum ad plures raperet.

§. XXVIII.

Nullum est dubium, quin ex iisdem principiis curæ sic dictæ sympatheticæ, si quid efficaciæ in illis est, eveniant, et si plurimum etiam regimini, ad quod rerum imperiti non attendunt, debeatur. Quodsi enim quis lectis circumvolutus sibi firmiter persuaderet, se assumisse medicamen, v. gr. sudoriferum, vel fieri aliquid, quod ab extra in corpus operetur & ad illum effectum duceret, sane si nil quicquam assumpsisset, vel nihil perageretur, sudore nihilominus diffueret: exempla vidimus supra. Pari ratione id procedit, ac si quis lecto decumbens vigilans vel somnians metu vehementi percellitur & maximum ex mentis agitatione sudoris profluviū experitur. Adeo non difficile est vaferrimis histrionibus apud imperitos famam aucupari eorundemque simplicitati imponere.

§. XXIX.

In primis vero ex illo mentem inter & corpus sublatu per imaginationem æquilibrio tot phantasie lusuū in gravidis notarumque in foetum transmissarum, quæ tot acutissimorum Philosophorum ingenia saepe fatigavit, perspicua satis reddi potest ratio. Nullum dubium est, quin pleraque, quæ hic miramur, per mechanicos catenatosque nervorum fluidi motus evidenter possint expediri, modo illud admittamus, quod supra notavimus & contra manifestum experientiæ testimonium negari nequit, animam ingenti desiderio, metu, terrore, timore, aversione concitataam, vehementi impulsu

dictum

Curation.
sympatheticæ
potissima
ratio.

Phantasie
lusu in
gravidis.

dictum modo fluidum ad certas partes, de quibus in illa commotione sollicita est, ut illas periculo quasi eriperet, posse determinare, easdem constringere, distorquere & varia ratione intercepto humorum motu disponere & alterare, in illis cum primis, quorum fortior est imaginandi vis quique affectuum motibus præ aliis sunt obnoxii. Docent hoc exempla, supra §. XXVI. allegata. Docet præterea ancilla, apud *Malebranchium*, cuius, quum candelam admoveret, dum ægro venæ pedis incidenterentur, simul ac scalpellum vidi infixum, tantus pavor invasit artus, ut per triduum aut quatriduum, in eodem pedis loco, quem viderat incidi, senserit dolorem adeo acerbum, ut decumbere coacta fuerit. *de Inquirenda Veritate Libr. II. Cap. VII. p. m. 94.* ubi non adeo ineptam rationem subjungit, quod spiritus in illas corporis partes vehementer se diffundant; quo pacto illæ intensiores factæ vehementiorem in mente excitent sensationem, ut sibi quasi ab incommodis, quæ aliis inferri videt, præcaveat. Huc pertinet historia *Theodor. Kerckring. Observ. Anat. III. p. 6.* de Quæstore Neoburgico, qui, cum frumentum ex granario rustici efferti juberet, a vetula, blande quidem, percussus, sollicitæ imaginationis vi primo tuberculum, deinde tumorem saccum frumenti referentem in dorso acquisivit. In primis vero hoc illustrat mirabilis historia, quam ex *Sim. Scholzii Histor. Med. mirabil. L. II. Cap. I.* excerptam sistit *Manget Bibl. Med. Pract. l.c. de Præconsulari Ministro*, qui vidi per somnium hominem quendam, sibi obviam venientem & lapidem in manu dextra tenentem, propiusque tandem accedentem & lapidem in pectus suum vibrantem, ac regionem supra ventriculum percutientem: quo somnio expergefactus, percepit dolorem in pectoris media parte supra ventriculum, accensa que candela animadvertisit in dicto loco maculam nigrum orbicularem, magnitudine pugni, quam, quum nihil esset, nisi sanguis extravasatus cum aliquali partis conquassatione, Chirur-

Phantasie
in info-
mno esse.
aus mira-
bilis.

Ejus ratio.

gus manc accersitus scarificatione, discutientibus & resol-
ventibus lege artis dispulit. Nullum hic est dubium, quin
anima, in subiecto disposito, insomni terrore perculsa, liqui-
dum nervosum ad partem, cui metuebat, eidem quasi suppe-
tias latura magno impetu alegarit, ac fibris ejusdem con-
strictis dolori, & sanguinis simul motu præpedito, extravasa-
tioni occasionem dederit. Pari ratione impetus liquidi ner-
vorum horrore imaginario concitatus in gravidæ matris
partes, ad quas fixa cogitatione intenta est anima, irruens, sed,
ob firmiorem fibrarum dispositionem, repulsus ad delicatio-
res embryonis partes harmonicas dirigitur, ibique vim & effi-
ciam suam exerit.

§. XXX.

Non sim-
plex adipe-
ctus rei
monstrosæ,
sed qui cum
animi mo-
tu conjua-
tus est, in
embryo-
nem opera-
tur.

Verum, ut pleniore demonstratione id ipsum dispale-
scat, notamus: non quamlibet impressionem in gravidis, aut
simplicem aspectum objecti monstrosi, deformis horridi ac
fœdi, vel etiam animalium, ranæ, soricis, bufonis, araneæ, ex-
tra nocendi potentiam constitutorum, aut commune deside-
rium pyrorum, pomorum, prunorum, fragorum, uvarum &
similium, sed potius Matris in res istas, cum ingenti horrore,
formidine, animique motu, quasi corpori vel vitæ pericu-
lum inde immineret, contuitum, sive verum, sive occasione
strepitus, soni, aut aliis rei ex improviso oblatæ fictum, trans-
lato, quem horror peperit, mediante fluido nervoso in em-
bryonem motu, non solum organis ejusdem sensoriis singu-
larem sentiendi dispositionem & natam inde idiosyncrasiam
inducere (exemplo formidinis gladii in Jacobum, Angliæ
Regem, a matre grava, atque gladiis in Rizium, Musicum
strictis perterrita, translatae) sed etiam partes certo ordine,
situ, nexu, figura disponere & quasi formare (quo perti-
net monstrum illud Cacodæmoni picto, quam homini simi-
lius, apud Kerckringium, Obs. Anat. XXIII. Illud etiam
Olig. Iacobæ, Act. Haffn. Vol. III. Obs. 59. nec non historia,
quam

quam de Colonitio recenset *Tob. Coberus, Obs. Vngar. VI.* qui ex matri gravidæ, cataphractum intuentis, imaginatione, pectus non ex costis, sed continuo solidoque osse habuit tanti roboris, ut ex durissimo ictu nihil doloris eo loco sentiret : aut etiam historia *Malebranchii, l. c. p. m. 90.*) easdem resolvere (vid. ejusdem *Malebranchii Observ. l. c. p. m. 95.* de Iuvene in Nosocomio Parisiensi, dicto *les incurables*, a prima nativitate, quod mater grida crurifragium Malefici cuiusdam adspexerat, mente capto & omnibus membris, quibus frangi solent rei, fracto, quem ipsa Regis Mater Nosodochium invisens, saepe vidit & loca brachiorum ipsius & crurum fracta contrectavit) vel abolere aut potius cum aliis confundere (exemplum recenset *Borrichius*, in *Act. Haffnienf. Vol. II. Obs. 82.*) vel cuti varios nœvos rerumque, circa quas commota phantasia est occupata, figuræ, eo in loco, quo vel sensus rem horridam deprehendit, vel grida in horrore manus configit, atque irritato sensu influxum undarum cerebri fletit & invitat, partes minimas directione motus in ordinatos situs atque nexus disponendo, imprimit, (exemplis plena est communis vita, plena Philosophorum & Medicorum scripta, *Miscell. Nat. Cur. Germ. Act. Haffn. Zod. Med. Gallicus*, totque aliorum observationum scriptorum vasta volumina.) Deinde id quoque diligenti Naturæ scrutatorum observatione constat : raro ante medium gestationis tempus notas illas in foetum transire, positis licet causis in actu causandi, sed plerumque a medio illo tempore ad ipsum partum, quamvis in illis, quibus membra plane disturbantur aut abalentur, paulo ante tempus illud mutatio plerumque accidat. *Borrichii* illa grida, aspectu mutili exterrita, mutilum pariens, nondum quatuor gestationis, cum impressionem pateretur, habebat menses.

Raro ante
medium
gestationis
tempus no-
tae in fo-
etum trans-
eunt.

§. XXXI.

Miranda sane hæc sunt omnia: quod si tamen mentis illud in corpus imperium, atque liquidi nervi ad partes illius impulsu determinati varium influxum, quibus partes tenduntur, stringuntur, torquentur, vasaque, partibus interjecta, comprimuntur, accurate expendamus, causas eorum, si non omnium plurimorum tamen invenire, adeo non erit impossibile, ut pleræque in promtu sint. Quomodo vis imaginationis in proprio quorundam corpore hac ratione efficaciam exeruerit & qua ratione determinato ad ipsarum matrum partes nervorum fluido, in illas, sine dubio, impetum faciat, sed duriori textura tonoque fortiori repulsa signaturas in illis exprimere nequeat, §. præced. XXIX. ostendimus; quo pædo vero ad easdem embryonis partes, teneras & moliores, eaque, quæ resistere posset, fibrarum rigiditate nondum pæditas, dirigatur, id plenius hic est dandum, neque enim ita perspicuum est. Arcanam esse utriusque corporis, matris & fœtus harmoniam & conjuratam affinitatem unamque animam sensitivam, utrumque iisdem prorsus sensationibus offici, ita, ut qui uni ex partibus sic mutuo devinctis & potiori accidunt sensus vehementiores, in alterum quoque redundent, easdemque fere cogitationes, quæ in mente matris occasione motuum corporis excitantur, in fœtu quoque similium motuum occasione excitari recte existimant saniores ex recentioribus Philosophi; cum occasione sentationum & commotionum fibrillarum medullarium cerebri variis mentis motus omnium consensu exoriantur, nec unquam sensus corporei sine veris sensationibus realibusque mentis passionibus excitentur. *Malebranch. l.c. p. 99.* Sed unde illa motuum corpororum & sensationum harmonia & in quo consistit? id enim potissimum in quæstione est. Hanc in æquali tensione & tono partium matris & fœtus quærarendam esse existimamus. Tensas esse humani corporis partes nervorum

vorum in specie reticula per illas expansa quem quæso latet? Nonne bona dispositio ipsarum, integritas æque ac functiones a congrua tensione dependent, ita ut, quum ea excidunt, non possint non pro diverso relaxationis gradu & sensus & motus aliæque actiones nutritio, secretiones &c. lædi? Quid quod corpus animale cytharam esse nervis suis, ut fidibus, constantem jam dudum pulchre & apposite prudentiores observarint. Äqualem vero utrinque in matris pariter ac Matri & fœtus partibus esse tensionem, inde clarissimum est, quod embryonis partes τὰ ὀργμῶνα sanguis & liquidum nerveum, a quibus est & ori- æqualiter tur, utriusque sunt communia & eadem fere ejusdem qualitatis, tensæ. consistentiæ, & quod convenienti etiam quantitate eodem que vel proportionato impetu utrobique influunt. Iam, cui non nota est illa inter corpora æque tensa sympathica har- monia, qua cum unum percutitur, movetur & alterum; quam in primis occasione scyphi vitrei per certum humanæ vocis sonum fracti, exemplo chordarum æque tensarum, tympanorum, scyphorum vitreorum aqua infusa ad consonantiam redactorum aliorumque corporum solidiorum, unius per- cussione arcana harmonia conspirantium fuse non minus quam solide illustravit, explicuit, demonstravit ḥ. mānū Morho- fius in allegato modo tractatu varia pariter ac vera eruditione refertissimo. In specie, singularem esse cuilibet fere corpo- ris parti tensionem, peculiaris cuiusque structura & actio in- nuit, idque exinde quoque perspici potest, quod certis moti- bus corporum sonorum tremulis certæ corporis partes, quæ eorum tensioni respondent, moveantur atque subsultent: Ita Claudio Perraultius, Gallus, *Libr. de Sono P. I. c. 4.* & ex eo Morhofius, *I. c. p. 81.* observavit, sonos tympani, tubæ aut chordarum panduræ majoris ipsum nonnunquam pectus percutere, neque tamen omnes tonos, sed illos tantum, qui conformes sunt tono ac tensioni diaphragmatis: quemadmodum ob æqualem & consonantem tensionem in Equite

illo Vascone phormingis sonus vesicam statim ad urinam reddendam vellicabat. vid. *Scaliger. Exercitat. 134. l. 6. p. 230.* conf. *Misc. N.C. A. 1. obs. 134.* Ita *Boylii* servo ob æqualem aut proportionatam membranæ aurium tympani, cum membrana gingivas investiente, tensionem, quoties cultros cote acuebat, ingratus stridor gingivas cruentabat, apud *Barthol. C. IV. Ep. 152.* Ergo, cum, ut apposite inculcat *Morbo-*

Quomodo phantasia matri in embryo-nem agat? *fius*, *omnis* nostra sensatio quasi in motu harmonico consistat, quid mirum, si, quando ad impressiones vehementiores cum animi extraordinario motu fibrillæ sensiles in matris cerebro concutiuntur, similis in fibrillis cerebri embryonis, atque aut proportionate tensis, impressio oriatur, atque hinc nervorum fluidum ad certas partes, de quibus phantasia sollicita est, aut quo manus fricatione invitatur, tam in matre, quam in foetu determinetur, ruat, impetum faciat? Atque ita corpus matris & embryonis se fere habebunt, ut duo horologia pendula, quæ motus suos pariter iisdemque momentis exercent, quo simili alias, ad explicandum modum quo voluntas corpori imperat, ex hypothesi *Harmoniae præstabilitæ magni Leibnitii*, *I. Laquelotus, de Fid. & Rat. consens. utitur*, vid. *Act. Erud. Lips. A. MDCCV. Mens. Decembr. p. 553.* Et licet solidiori fibrarum & partium matris textura atque tensione repellatur, in embryonis tamen partibus eo magis efficaciam suam exerit, quo magis illæ sunt tenellæ & molliores quam ut vehementem impressionem non possint recipere; in primis cum non cerebrum solum, sed & reliquæ matris & foetus partes, ob æqualem & proportionatum influentium motum, harmonice conspirent, atque ita impetus a partibus matris in easdem teneriores foetus partes, videntæ harmoniæ, transferatur, & impetum a cerebro embryonis venientem augeat.

§. XXXII.

Inde omnium supra recensitorum effectuum derivatur ratio. Hinc etiam appareat, cur juvenis ille, in Nosodochio Parisiensi, præter crutifragium, simul rationis deliquum fuerit passus? cerebrum enim, tum temporis molle, delicatum illo vehementi motu & impressione a matre in id ipsum derivata misere distorquebatur, ut postea ad functionem suam rite exequendam ineptum esset. Hinc quoque sponte fluit ratio, cur ante medium gestationis tempus, positis licet causis, in actu etiam causandi, rarius id generis signaturas admittant embryonum corpora, cum ob fibrarum mollitiem ac diffluentem fere corporis habitum, & ad requisitam tensionem & consequenter ad motus sensationum harmonicos inde recipiendos minus idonea sint. Quando in quibusdam gravidis, quæ ad animi commotiones, præ aliis proclives sunt, accidit, ut paulo ante illud tempus, oblato deformati objecto exterreantur & graviori sensu concutiantur, facile fieri solet, ut tensis jam quodammodo fibris, mollissimis tamen adhuc & valde tenellis, vehementi impulso notæ profundiores inprimantur vel pro re nata, tota ipsarum conformatio & nexus disturbetur, ut partes ita periisse videantur. Interea ingenue fateimur, esse in accuratissimis figurarum expressionibus & delineationibus plura adhuc humano ingenio impenetrabilia quæque sine principii Naturæ incogniti subsidio ex omni parte expiri nequeant. Quod enim de spiritibus ideis suis instructis vulgo tradunt, faciliter dicitur quam evidenti mentis comprehensione percipitur aut probatur. Mentem maternam in animam embryonis occasione motus utriusque cerebri harmonice tensi impressiones deferre, adeo non negamus, ut ex modo dictis satis clarum esse arbitremur: Eandem vero figurandi facultatem huic communicare, ex hypothesis, qua anima ipsa sibi futurum domicilium corporisque habitandi supellecilem formare supponunt, iis argumentis refellitur,

medium
gestat. tem-
pus, rarius
ejusmodi
signaturæ
impriman-

Plura hic
reperiuntur
humano in-
genio im-
penetrata-
bilia.

quibus dictam hypothesis falsissimam esse evicerunt *Peyrus*, *Mercolog. l. i. c. 5.* *Sturmius*, *Phil. Eclect. T. II. Diff. de Gener. Plant. & Animal.* *Geuderus*, *Ep. de Ort. Animal. Distrib. de Ferment. subjunct.* aliquique sanioris Philosophiæ Antistites quamplurimi. Et quis, quæso, persuadere sibi poterit, id animam perficere posse, non dicam sine deliberatione, præmeditatione, sed sine omni conscientia? Cur non nisi in anxia commotione id, quicquid hic est virium, exerit? Quis candem in illa perturbatione ad facultatem illam in actum rite deducendam, aptam crederet? Cur non potius, si penes illam staret, deformitates quovis modo impediret, quam produceret? quamvis, quod ex nostra quoque sententia apparet, gravidæ ex sanæ rationis imperio, sibi ab intempestivis animi commotionibus temperando & enormiores intemperatos fluidi nervorum motus præcavendo, compescendo, vel affectibus indulgendo eosdemque fovendo, plurimum ad impediendum aut promovendum ejusmodi effectum contribuere possint. Quid denique in brutis efficiens horum effectuum causa est? Num & illorum anima facultate tali formatrice structoria & dispositoria instructa est? Quis credit? Quis credere posset? In brutis vero idem evenire, oves simile quid evenit. *Iacobi Patriarchæ exemplo* sunt, ut alias hujus rei Curiosorum observationes reticeam. In primis vero id nos docuerunt vaccarum tempore gestationis maestatarum foetus, quos factus a lanionibus sape acceptos, cum inspicceremus & dissecaremus, non sine admiratione, eundem capitis vitulini locum, pit, in capite quo vacca in capite ictum lethalem excepit, sanguine non effectum secus, ac si ipse vitulus immediate percussus fuisset, suffusum, reliquis partibus optime constitutis, & nil quicquam, quod læsum esset, ostendentibus, vidimus.

§. XXXIII.

Sed cum a destructo per imaginationem mentis & corporis æquilibrio effectus hosce in homine deduxerimus, non nisi

sine ratione quæritur, quomodo in brutis, mente destitutis, producantur? Respondemus, mente quidem bruta esse destituta, sed non anima, uti loqui amant, brutorum sive principio vitali sentiendi & movendi potentia instruto, inter quod & corpus organicum simili ratione datur æquilibrium. Datur etiam æquilibrium in brutis inter principium vitale & corp. organ. Est scilicet in illis, non secus ac in corpore humano, alternus fluidi nervorum & sanguinei in partes influxus, quo, cum motus automatici, in musculis antagonistibus carentibus, absolvuntur, tum reliquæ partes æquilibrantrur. Est & in illis principium quod & impressiones objectorum mediantibus nervorum tensorum vibrationibus sentit, & nutu suo liquidum subtile ad hanc vel illam partem impellit atque vi superaddita æquilibrium tollendo motuum variorum spontaneorum causa existit. Præterea imaginantur bruta, nec ab affectibus sunt immunia. Quidni igitur sublato a parte corporis inter nervorum & sanguineam fluidum æquali sive proportionatō nisu vigor principii vitalis obnubilari & æquilibrium inter principium vitale brutorum & eorum corpus immutari possit? Apparet hoc in somno, temulentia ab ebriaminibus inducta (cujus rei experimenta ipsi sæpe cepimus) in rabie aliisque a cerebri corruptione dependentibus ipsorum morbis. Et quidni a parte illius principii nimium exagitati, commoti, exterriti, compulso ad partes vehementi impetu nervorum fluido æqualis illa motuum proportio turbari posset? Docet hoc quorundam ob stabulum mutatum, ob insuetam solitudinem tristitia & inde contracta macies: docet excrementorum præ metu excretio: docet interitus a subitaneo & vehementi terrore: docent denique præter alias plurimas observationes ipsi imaginationis effectus, qui vel soli luculentissimum argumentum præbent, non esse bruta mera automata aut neurospasta, omni sensu & cognitione destituta, prout Anton. le Grand, de Carent. sens. & cognit. in brut. I. Darmanson, tr. la Beste transformé en machine, post
Bruta non
sunt mera
automata.

Illustr. des Cartes, (quem tamen alieniorem ab hac sententia fuisse contendit Sturmius, Optic. S. I. Cap. V. §. IV.) orbi persuadere sustinuerunt, a P. Ignat. Gast. Pardies, dans le Discours de la connoissance des Bestes, pro merito excepti & refutati.

§. XXXIV.

Liceret equidem pluribus exemplis rationem nostri æquilibrii illustrare, nisi ad paucas pagellas illud adstringendi institutum id dissuaderet. Ex his vero, quæ fusius jam disseruimus, satis superque patere arbitramur, quantum in eo possum sit, ut æquilibrium illud intemeratum servetur & quantum hæc ipsa doctrina in studio Medico utilitatem habeat, cum omnes sanitatem a morborum insultibus tuendi eandemque labefactatam restituendi præcepta & regulæ huc tanquam ad scopum tendant. Vita nostra mutuo mentis & corporis commercio ac proportionata utriusque actione, nec non partium solidarum a succo nervorum tensarum & fluidarum motibus constat. Horum rationem & causas, qui bene perspectas habuerit, quique eos intra debitæ proportionis leges continere, impeditos adjuvare, exfuscitare, minus congruos in ordinem redigere, immoderatos & extravagantes tempestive cohibere, temperare, & ubique pristinam æqualitatem restituere noverit, is demum valetudini hominis cum ratione mederi ac veri & excellentis Medici, quem iσθεον vocat *Hippocrates*, munus explere poterit. Præterea id quoque inde clarissimum est, proportionem illam non solum mutari per τὰ ἐθίσμενα καὶ πνόμενα, sed etiam quando ἡ γράμματα verbis Hippocraticis, & in eo non solum studium sanitatis consistere, quando non satiamur cibis & integri sumus ad labores, neque ita solum motus & transpirationem promoveri, sed id potissimum hic requiri, ut affectus rationis freno moderemur & animi motus & agitationes nimias compescamus, cum nihil magis corporis motus pervertere, transpirationem, quæ omnes reliquas excretiones multum superat

Vtilitas
hujus do-
ctrinæ.

rat & in qua tota sanitatis ratio est, una cum aliis actionibus secretoriis & præparatoriis coërcere atque supprimere possit, quam animi atque affectuum intempestivi motus, quibus fluido nervorum vehementi impetu agitato & hinc constrictis ubique fibris, totus non solum exterior habitus coangustatur, sed reliquorum organorum textura ad actiones, a fibrarum justa tensione pendentes, inepta redditur. Vnde in methodo quoque sanationis nihil magis agendum, quam, ut præter organorum, si læsa sunt, integratatem illius in primis æquilibrii legitimam proportionem quovis modo restituamus, idque prudenti regimine pro rei exigentia & prout causa mutati æquilibrii vel in corpore ejusque partibus, fluidis, solidis, vel in animo vel in utroque simul residet, modo sanguinis expansivum motum augendo, modo compescendo, modo animi commotiones excitando, modo sopiendo. Vbi in primis tenendum, quando assidua studiorum contentionæ æquilibrium destruitur, atque lumbis sedendo, oculis videndo dolentibus, ac animo summa applicatione defatigato, sanitas non leve detrimentum ac noxam (de qua in primis elegans doctissimi *Franci a Franckenauv Dissert.* quæ de *Noxa studiorum* inscribitur, legi meretur) capit, nihil aptius æquilibrium restituere, quam id, ad quod *Muretus, Paulo Sacrato* suo suasor & impulsor fuit, quando *Epist. XVII.* ita ad eum scribebat: *Peto a te, ut quantum me amas, tantum operæ ac diligentiae conferas ad valetudinem tuam & confirmandam & conservandam.* Hoc ita videris facillime consequi posse, si ad corporis exercitationes aliquid addideris, de exercitationibus animi & ingenii aliquid detraxeris. Sic etiam *Galenus, L. de sanit. tuend.* Cap. XI. testatur: *Nos agros quotannis non paucos, per sanavimus solis animi motibus ad debitum motum revocatis.* Dolet celeb, *Baglivus, l. c. Canon. L.* remedia sæpe adhiberi indiscriminatim nullo ante facto examine, an iracundus sit æger, an placidis moribus præditus? an aridus, siccus, an mollis & succi

succi plenus? an morbis animi laboret, nec ne? quinam sit clater in solidis? quænam acrimonia in liquidis? quod æquilibrium utrisque? Felicem ergo, sic verba ipsius habent, Medicum, qui reconditas morborum successiones noverit & Abcedarium Naturæ per analogiam loquentis optime didicerit.

*Qui hæc non habet, non credat se clavem habere
curandorum morborum.*

TANTVM!

COROLLARIUM.

Quamvis elegans atque ad illustrationem questionis controversæ, de Motu Mercurii in Tubo Toricellino, apprime faciens experimentum sit, quod ex mente Illustris Leibnitii nuperrime proposuit Clariſſ. Ramazzini, Prof. Med. in Lyc. Patavin. Primar. Epistol. nova Ephemerid. Barometricis iterato editis adjecta & Ephemerid. Illustr. Acad. N. C. Cent. I. & II. Append. inserta, nec non in Act. Erud. Lips. Ao. 1711. Ian. p. 10. recensita, quando scil. vasculum, aqua, cum innatante corpore cavo, plenum ex libra suspensum & cum pondere opposito in æquilibrio constitutum, quamprimum corpus innatans descendit, levius redditur, ut præponderante pondere opposito æquilibrium mutetur: id tamen exinde nullo modo sequi videtur, quod præter laudatissimi Leibnitii mentem inde deducere voluit Doctiſſ. Ramazzini: Corpus grave, quando per fluidum aliquod descendit, gravitatem suam inter descendendum non exercere, cum ipse descensus gravitatis actum non tam supponat, quam ad oculum ostendat. Neque enim causa mutati hic æquilibrii in corpore descendente, sed potius in fluido ambiente & dum corpus innatans descendit, ascidente, querenda est. Non corpus descendens, sed fluidum ascendens, aliquantis per gravitatem non exerit. Videlicet, quandiu corpus illud cavum aquæ innatat, tandem gravitatem cum aqua conjunctim exercet: quando vero descendit, tantum aquæ loco suo pellit, quantum mole sua spatiū occupat, idque quicquid est aquæ, tum quidem necessario ascendit & inter ascendendum vasculum subjectum pondere suo premere nequit, quamobrem ponderi totius aliquid decedit, donec ubi corpus innatans fundum attigit, unita denuo gravitate deorsum ferantur & pristinum æquilibrium restituant. Neque etiam, quam ex acutissimi Borelli propositione elicit,

consequentia firmo stare tali videtur: Corpora, quæ per aërem descendunt, gravitate tantisper destitui, vel eandem non exerere; licet enim in allegato exemplo lanæ involucrum superius inferius, quamvis illud tangat, inter descendendum non comprimat, quoniam nempe eidem cedit atque propria jam gravitate descendens æquali fere motu præcurrit, pellat tamen, premat, donec ubi cedere amplius nequit & obnittitur, comprimat. Aliud est pellere, premere, aliud comprimere.

INgenii dotes cum sedulitate repertas

Approbat hoc Specimen, docte FABERE, Tuum,

Conatus collaudo Tuos, DEVS ipse secundet

Istos, quo capias, præmia digna brevi.

*Hic Nobilissimo Dn. Respondenti, de egregio eruditissimo
specimine, ex animo gratulatur*

Georgius Theodorus Barthold / Dr.
P. P. Ordin. p. i. Acad. Rector.

Quæ Deiner Sinnen Krafft in gleicher Wage steht
Und des Gemüthes Erieb nicht aus dem Circkel geht/
Hat Dein vernünftig Thun uns / Wehrter / längst gewiesen/
Dass / wer Dich noch gekant / den muntern Sinn gepriesen.

Heut zeigst Du öffentlich / wie nach des Schöpfers Rath
Des Menschen Seel und Leib sein gleich Gewichte hat/
Zugleich auch / wie Dein Fleiß kan vieles überwiegen
Und manchen schweren Satz aus wahrem Grund besiegen.

GOtt / aller Weisheit Grund / von dem viel Segen fließt/
Der alles in Gewicht / in Zahl und Maß beschließt/
Läß uns dereinst an Dir ein schönes Beyspiel sehen/
Wo Tugend / Ruhm und Glück in gleicher Wage stehen.

*So wolle dem Herrn Respondenti wohlmeinend
und von Herzen gratuliren*

der

P R A E S E S.

Quæ Gottes Hand und Sein allein recht weißer Rath
Den grossen Bau der Welt/
Und was desselben Kreiß umschlossen hält /

G

Mach

Nach Maß / Zahl und Gewicht /
 Hab mehr als künstlich zugericht
 Und als ein Werck und Uhr /
 Woran der Mensch die größte Weisheit schauet /
 Wo jedes Stück in seiner Spur
 Und Ordnung richtig bleibt /
 Worin Sein kräfftig Wort und Segen alles treibet /
 Höchst schön erbauet :
 Auch wie der Mensch / die kleine Welt /
 Worin die rege Kraft
 Den unterschiednen Lebens-Saft
 Durch die so wohl gefügte Glieder /
 Ohn Auffhörr hin und wieder /
 Zum Nutzen der Gesundheit leitet /
 Sey von Ihm eben so bereitet ;
 Difz hat viel theurer Lehrer Kiel und Mund
 Mit wahrem Grund
 Und aus der Sache selbst erwiesen.
 Difz ist der rechte Weg /
 Der klaren Weisheit Steg /
 Der jetzt von allen Klugen wird gepriesen.
 Drum / da Du / Wehrtester / auf eben dieser Bahn
 Ganz froh hinan
 Zum Schloß der wahren Wissenschaften steigest /
 Und jezo schon die Blüht und Frucht /
 Wann Dein Gemüthe nur was wahr und was verünftig sucht /
 Von Deinem Fleisse zeigest /
 So ruff ich / als ein Freund / Dir zu :
 Gott segne Deine Müh und fördre Deine Ruh !
 Du kannst in vollem Trieb durchs Hauf der Tugend gehen /
 Man wird Dich bald im Ehren-Tempel sehen !

Also wolte dem Herrn Respondenti seine Ergebenheit bezeugen
 und zu denen durch dieses Specimen an den Tag gelegten
 Gemüths-Gaben so herklich als schuldig glückwünschen

Ludwig Jeremias Antoni,
 von Gießen / Phil. & Med. C.

